

उनें आखेया जे सुरक्षाबले दे पिच्छले 5एं-6एं बरे दी समर्पत कोशशें कन्नै जम्मू-कश्मीर च इक्क डर सवां मुक्त माहौल कायम होआ ऐ- जेदे कन्नै नौजवानें लेई अपने सुखने पूरे करने आहला समावेशी सरिस्ता तयार होआ ऐ।

<><><><><><>

DGP -Property Attached

जम्मू-कश्मीर दे डी.जी.पी. नलिन प्रभात होरें श्रीनगर च वकील मियां अब्दुल क्यूम दी जायदाद UAPA कनून तहत कुर्क करना दा आदेश दिता ऐ। डी.जी.पी. हुंदे आसेया जारी हुकम च आखेया गया ऐ जे 31 दिसम्बर 2009 गी क्यूम नै इक्क सैमीनार च भारत विरोधी भाषण दिता हा ते राष्ट्र विरोधी नारे लाए हे। हुकम च आखेया गया जे अगड़ी पड़ताल- ते क्यूम दे घरै च लैती गेदी तलाशियें दौरान ऐतराज आहला समेयान बरामद होआ। कारवाई च दंड मंजिला मकान ते दो कनाल- इक्क मरला ते 90 स्केयर फिट जीमी कुर्क कीती गई।

<><><><><><>

Dy. CM -Delegation

उपमुख्यमंत्री सुरेन्द्र चौधरी होरें जमीनी स्तरै पर शासन गी मजबूत बनाने लेई सेवाएं गी लोकें तोड़ी तुरत पजाने ते लोकें दी शकैतें दा तेजी कन्नै नबेड़ा करने दे सरकार दे धेइयै गी फही पक्का कीता ऐ। सिविल सचिवालय जम्मू च लोकें तोड़ी पुज्ज बनाने सरबन्धी इक्क व्यापक सत्र च उपमुख्यमंत्री होरें जम्मू ते श्रीनगर सवां आए दे बक्ख-बक्ख डैलिगेशनें कन्नै मुलाकात कीती। इनें डैलीगेशनें राएं इलाके दे बक्ख-बक्ख मसलें बारे दस्सेया गया। उपमुख्यमंत्री होरें भरोसा दिता जे उंदी जायज चैंताएं दा समें सिर नबेड़ा कीता जाग।

<><><><><><>

CSIR IIM-Workshop

दोआइयें दी खोज ते राई-बाई दे क्षेत्र च आर्टिफिशल इंटेलीजेंस पर आधारित काहडे बारे इक त्रै-रोजा कार्यशाला कल कठुआ जिले दे गाट्टी स्थित- बायोटेक पार्क दे BIRAC-Bio Nest इन्क्यूबेटर च शुरू होई। वैज्ञानिक ते उद्योगिक अनुसंधान परिषद सी.एस.आई.आर. –आई.आई.आई.एम. दे बैनर हेठ आयोजित इस कार्यशाला दा उदघाटन सी.एस.आई.आर- सी.इ.इ.आर.आई. पिलानी दे निदेशक डाक्टर पी.सी. पंचारिया होरें कीता- जिसलै के सरकारी मैडिकल कालेज दे प्रिंसिपल डाक्टर सुरिन्दर कुमार अतरी- मानजोग परौहने दे तौरा पर मजूद हे। डाक्टर पंचारियां होरें अपने सम्बोधनै च आखेया जे आर्टिफीशल इंटेलीजेन्स दा औषधि ते कृषि अनुसंधान च इस्तेमाल दी बड़ी मती गुंजैश ऐ ते एहदे नै मते शानदार नतीजें हासल कीते जाई सकदे न। पत्रकारें कन्नै इस मौके गल्ल करदे होई आई.आई.एम जम्मू दे डरेक्टर- डाक्टर ज़बीर अहमद होरें आखेया.....

<><><><><><>

Rana –Illegal Units

पर्यावरण ते जंगलात मंत्री जावेद राणा होरें कल मैहकमे दे अधिकारियें गी निर्देश दिता जे ओह जम्मू जंगलात डिविजन दे अंदर गैर-कनूनी स्टोन क्रैशर युनिटें-Hot Mix प्लांटें ते Batching प्लांटें खलाफ सख्त कारवाई करन। मंत्री होरें सिविल सचिवालय जम्मू च इक उच्ची सतह दी जायजा मीटिंग दी अध्यक्षता करदे होई अधिकारियें गी एह निर्देश दिते। उनें जंगलाती इलाके दे आले-दुआले इस चाली दी उद्योगिक इकायें दे संचालन ते कम्मकाज दा जायजा लैता। उनें आखेया जे जंगलात मुत्तलक नियमें दी खलाफवर्जी करने आहलें खलाफ कनूनी कारवाई कीती जाग।

<><><><><><>

Sakeena –Fee Fixation

शिक्षामंत्री स्कीना इत्तू होरें कल्ल सिविल सचिवालय श्रीनगर च इक्क मीटिंग दी अध्यक्षता कीती। इस मीटिंग च समूलचें जम्मू-कश्मीर च प्राइवेट स्कूलें सरबन्धी नियमें ते फीस तैय करने दे मुद्दे पर सोच-विचार कीता गया। इस दौरान मंत्री होरें जम्मू-कश्मीर दे प्राइवेट शिक्षा संस्थानें च संचालन पारदर्शता- नियमें ते फीस मुतलक मसलें समेत-बक्ख-बक्ख विषयें पर ब्योरेबार चर्चा कीती। मंत्री होरें इस गल्ला पर जोर पाया जे शिक्षा इक्क सामाजिक जिम्मेदारी ऐ। उनें गैर वाजिब फीस दी बजट कन्नै कोई बी विद्यार्थी दे शिक्षा दे मौके सवां वंचित नैई रौहने गी यकीनी बनाने दी सरकार दे धेइयै गी दोहराया। उनें अधिकारियें गी दिशा-निर्देशें गी सख्ती कन्नै लागू करने दे निर्देश दिते।

<><><><><><>

Kishtwar -Vande Matram

सरकारी डिग्री कालेज किश्तवाड़ दी NCC युनिट दे बाटनी, इ.वी.एस, ज़ोलोजी ते जुग्राफी विभाग आसेया किट्टै रलियै बूहटे लाने दा इक अभियान चलाया गया। एह अभियान भारत दे राष्ट्रगीत वंदे मातरम दे डेढ सौ बरे पूरे होने दे सिलसिले च आयोजित कार्यक्रमें दे इक हिस्से दे तौरा पर चलाया गया। अभियान च कालजे परिसर च चीढ- दयार ते किश होर सदाबहार बूहटे लाए गे। इस अभियान दा मकसद वंदे मातरम दे 150 बरे मनाने दे कन्नो-कन्नी नौजवानें च रुख-बूहटे प्रति लगाव ते उन्दे महत्व बारे जागरुकता पैदा करना बी हा। आकाशवाणी कन्नै इस बारे गल्ल करदे होई प्रोफैसर असमा जावेद होरें आखेया.....

<><><><><><>

Prog. Announcement

आकाशवाणी दा क्षेत्रीय समाचार एकांश 'विश्व मधुमय दिवस' दे मौके पर औंदी 14 नवम्बर गी 30एं मिटनें दी इक विशेष चर्चा प्रसारित करने जा'रदा ऐ जेहदा विषे ऐ डायबीटीज, इट्ज़ काजिज, सिम्पटम्ज़ एण्ड

प्रिवेंशन यानि मधुमय एहदे कारण, लक्षण ते एहतियाती उपाऽ। कल शुकरवारें दिनें ढाई बजे प्रसारित होने आहले इक विशेष कार्यक्रम च स्हाड़े मेहमान होङ्गन जम्मू मेडिकल कॉलेज च एंडोक्रिनोलोजी विभाग दे अध्यक्ष डॉ. सुमन कोतवाल जेहडे शुगर रोग बारै जानकारी श्रोताएं कन्नै सांझी करङ्गन। इन्दे कन्नै गल्लबात करङ्गन स्हाड़े न्यूज एंकर विजय बजाज। एह् कार्यक्रम स्हाड़े इस्सै चैनल पर मीडियम वेव 303 मीटर यानि 990 किलोहर्टज ते एफ.एम 100 इशारिया 3 मैगाहर्टज पर सुनी सकदे ओ।

<><><><><><>